

ՏԵՂԻ ՈՒՆԵՑԱՎ «ԲՆԱՊԱՀՊԱՆՈՒԹՅՈՒՆ ԵՎ ԱՍՏՎԱԾԱԲԱՆՈՒԹՅՈՒՆ» ԳՐՔԻ ՇՆՈՐՀԱՆԴԵՍԸ

Հունիսի 4-ին «Արմենիա Մարիոթ» հյուրանոցի «Աշոտ Երկաթ» դահլիճում տեղի ունեցավ Մայր Աթոռ Սուրբ Էջմիածնի Վազգենյան Հոգևոր Դպրանոցի և Երևանի պետական համալսարանի համատեղ ջանքերով լույս տեսած «Բնապահպանություն և Աստվածաբանություն» գրքի շնորհանդեսը: Գիրքը հրատարակվել է Վազգենյան Հոգևոր Դպրանոցի փոխտեսուչ Ս. Մինաս քահանա Մարտիրոսյանի, ԵՊՀ Էկոլոգիայի և բնության պահպանության ամբիոնի վարիչ Կառլեն Գրիգորյանի և ԵՊՀ Էկոլոգիայի և բնության պահպանության ամբիոնի դոցենտ Ալեքսանդր Եսայանի համահեղինակությամբ:

Գրքի հրատարակությունն իրականացվել է Եկեղեցիների Համաշխարհային Խորհրդի Հայաստանյան Կլոր Սեղան հիմնադրամի հովանավորությամբ՝ «Կանաչ աստվածաբանություն» ուսումնական ծրագրի շրջանակներում: Գրքում ներկայացված են Էկոլոգիայի և բնապահպանության հիմունքները և քրիստոնեական Եկեղեցու տեսակետն Էկոլոգիական ճգնաժամի մարդածին լինելու վերաբերյալ: Որպես այդ ճգնաժամից դուրս գալու միակ ու ճշմարիտ ճանապարհ նշվում է մարդու ապաշխարությունը՝ զուգակցված քրիստոնեական հիմնական առաքինություններով զարդարվելու և իր բարձրագույն կոչմանը հասնելու ձգտմամբ:

Հանդիսությունը բացեց ԵՀԽ Հայաստանյան Կլոր Սեղան հիմնադրամի գործադիր տնօրեն դոկտոր Կարեն Նազարյանը: Այնուհետև մարդ արարածի՝ բնության պահպանության ու խնամքի աստվածավանդ առաքելությանն անդրադարձավ Արցախի թեմի առաջնորդ, Կլոր Սեղան հիմնադրամի հոգաբարձուների խորհրդի նախագահ Գերաշնորհ Ս. Պարզև արքեպիսկոպոս Մարտիրոսյանը: Սրբազան Հայրն ընդգծեց մարդու դերն արարչության մեջ ոչ իբրև տիրակալի, այլ առաջնահերթորեն որպես խնամակալի ու մշակի: Այս հրատարակության կարևորության մասին խոսեց ԵՊՀ Կրթության վարչության պետ Հ. Ժամհարյանը՝ ընդգծելով, որ այս ոլորտում սա առաջին հայալեզու ձեռնարկն է և մեծ արժեք ունի ուսանողների համար: Ս. Մինաս քահանան ու Կ. Գրիգորյանը ներկայացրեցին գրքի ստեղծման ընթացքն ու ներառած խնդիրները: Ելույթ ունեցան նաև բնապահպանական տարբեր կազմակերպությունների ներկայացուցիչներ՝ զուգահեռներ տանելով քրիստոնեական աստվածաբանության և բնապահպանության միջև:

Հանդիսությանը ներկա էին Մայր Աթոռ Սուրբ Էջմիածնի Գևորգյան Հոգևոր Ճեմարանի տեսուչ Ս. Վազգեն վրդ. Նանյանը և Վազգենյան Հոգևոր Դպրանոցի տեսուչ Ս. Մկրտիչ վրդ. Պողոսյանը, ԵՊՀ ռեկտոր Արամ Միմոնյանը, ԵՀԽ նախկին գլխավոր քարտուղար Կոնրադ Ռայգերը, ԵՀԽ Հայաստանյան Կլոր Սեղան հիմնադրամի և ԵՊՀ պաշտոնեությունը, տարբեր հարանվանությունների և բնապահպանական տարբեր կազմակերպությունների ներկայացուցիչներ:

*ՄԱՅՐ ԱԹՈՐ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*